

Jangan pilih jurusan sebab ikut kawan

Oleh Dr Nur Raihan Che Nawi

Menamatkan peperiksaan Sijil Pelajaran Malaysia (SPM) adalah detik penting dalam kehidupan seorang belia. Ia bukan sekadar menandakan tamatnya fasa persekolahan, tetapi membuka pelbagai laluan masa depan, sama ada dalam bentuk pengajian tinggi, latihan kemahiran, atau terus ke alam pekerjaan.

Bagaimanapun berdasarkan kajian dan pembabitan langsung dalam pengambilan pelajar, dapat dilihat dengan jelas sebahagian anak muda masih keliru dengan laluan kerjaya selepas SPM. Malah bagi sesetengah belia, ia menjadi cabaran yang besar.

Kajian mendapati belia awal (antara lingkungan usia 15 hingga 18 tahun) masih keliru dengan pilihan kerjaya mereka selepas SPM.

Bagi kumpulan belia pertengahan (19-24 tahun) dan belia akhir (25-30 tahun) pula, mereka tidak mempunyai maklumat mencukupi mengenai laluan kerjaya yang sesuai dengan minat, potensi dan personaliti. Lebih membimbangkan, ramai memilih jurusan pengajian hanya atas sikap 'asal masuk universiti' selain terpengaruh dengan rakan sebaya atau kerana tekanan keluarga, dan bukan berdasarkan kesesuaian dengan potensi diri.

Tidak sedar potensi diri

Antara faktor utama mereka masih keliru mengenai laluan kerjaya ialah kurangnya pendedahan awal mengenainya yang wujud di pasaran. Ramai lepasan SPM tidak pernah didedahkan dengan pelbagai bidang kerjaya semasa di sekolah rendah

dan menengah, walaupun terdapat program Hari Kerjaya dianjurkan di sekolah.

Hal ini menyebabkan pendedahan mengenainya agak terhad, menyebabkan ramai murid yang tertanya-tanya, 'mengapa saya tidak tahu ada bidang ini?'

Sebenarnya, ramai pelajar tidak menyedari potensi, kekuatan dan minat diri kerana tidak menjalani penilaian kerjaya secara terancang. Unit Bimbingan dan Kaunseling (UBK) di sekolah umumnya sudah melaksanakan pelbagai program penilaian minat kerjaya, tetapi masih ada pelajar yang memandang ringan kepentingannya, sedangkan penilaian ini memberi impak besar kepada masa depan mereka.

Begitu juga dengan kekurangan maklumat menyeluruh mengenai program pengajian di universiti, hanya menambah lagi kekeliruan. Ramai pelajar tidak memahami kaitan antara jurusan yang diambil dengan kerjaya sebenar di pasaran kerja.

Malah sebenarnya, berdasarkan pengalaman saya mengajar subjek umum merentas fakulti, masih ramai pelajar tahun pertama belum jelas hala tuju kerjaya mereka, menyebabkan ketidakpadanan antara jurusan diambil dengan peluang kerjaya selepas tamat pengajian.

Hal ini menjelaskan, bimbingan kerjaya sepatutnya tidak hanya bermula apabila pelajar sudah berada di universiti, tetapi perlu dimulakan lebih awal lagi, iaitu seawal Tingkatan Tiga. Pada tahap ini, pelajar perlu memahami potensi diri dan mula merancang laluan pengajian serta kerjaya sebelum memilih aliran di Tingkatan Empat, sama ada aliran sains, sastera, perdagangan, teknikal, vokasional, agama atau STEM.

Pemilihan aliran ini adalah langkah awal

dalam menentukan bidang pengajian dan kerjaya selepas SPM.

Proses kritikal

Apabila pelajar membuat penilaian minat, personaliti dan nilai hidup secara terancang, mereka dapat membuat pilihan lebih bijak ketika memohon pengajian ke universiti. Dalam konteks Universiti Putra Malaysia (UPM) dan universiti awam lain, pemilihan jurusan pengajian adalah proses kritikal yang memberi kesan besar kepada prestasi akademik, motivasi dan kejayaan kerjaya selepas tamat pengajian.

Tahniah dan syabas diucapkan kepada semua pelajar yang berjaya melanjutkan pengajian ke universiti! Kejayaan ini bagaimanapun hanyalah permulaan kepada perjalanan baharu yang lebih mencabar namun penuh peluang untuk digilap. Sebagai mahasiswa, anda perlu menggilap potensi diri bukan sahaja dalam bidang akademik, tetapi juga melalui pembabitan aktif dalam kelab, persatuan, program sukarelawan dan kepimpinan. Pembabitan ini akan membantu anda membina sahsiah, kemahiran insaniah dan rangkaian sosial yang bermanfaat untuk masa hadapan.

Dalam masa yang sama, pastikan anda bijak membahagikan masa supaya tanggungjawab akademik tidak terabai. Keseimbangan antara pembelajaran dan pembabitan dalam pelbagai aktiviti kokurikulum di kampus akan melahirkan graduan yang holistik, berdaya saing dan bersedia untuk menghadapi masa depan.

Selamat maju jaya di alam universiti, tempat anda menimba ilmu, membina jati diri dan merangka masa depan. Pilihlah jurusan anda dengan bijak, bukan sekadar ikut-ikutan, kerana masa depan anda adalah tanggungjawab diri sendiri.



Pensyarah Kanan Jabatan Pemajuan Profesional dan Pendidikan Lanjutan Fakulti Pengajian Pendidikan, UPM